

Көршілерімізбен алыс-берістің көкжиегі кеңейеді

26 қазан 2013 | 00:10 | Қоғам | Қаралған: 2525 | Пікірлер: 0



Кеше Шығыс Қазақстандағы күндері аясында облысымызға Ресейдің Алтай өлкесінің губернаторы Александр КАРЛИН бастаған делегация келіп, Глубокое ауданы мен Өскемендегі бірқатар нысандарды аралап, аймақ басшысы Бердібек САПАРБАЕВпен бірге меморандумдар мен келісімдерге қол қою рәсіміне қатысты.

Алдымен облыс Әкімі Бердібек САПАРБАЕВ Ресей Федерациясының біздің өңірмен шектесіп жатқан Алтай өлкесінде болып, мұндағы пайдалануға берілген «Поспелиха – Курья – Третьяково – Қазақстан Республикасының шекарасы» тасжолының салтанатты ашылуына қатысты. Облыс Әкімі бастап барған шығысқазақстандық делегацияны Алтай өлкесінің губернаторы Александр КАРЛИН қарсы алды.

Бұл жол екі елдің қарым-қатынасына берік негіз қалайды

Айта кетейік, аталмыш шара Алтай өлкесінің губернаторы А.КАРЛИННИҢ Шығыс Қазақстанға іссапары аясында жүзеге асты. Салтанатты рәсім барысында көршілес екі аймақтың басшылары күрделі жөндеуден өткен тасжолдың шекараға таяу бөлігін көріп, жүргізілген жұмыстарға жоғары баға берді.

Алтай өлкесінің Поспелиха, Курья, Третьяково аудандарынан еліміздің шекарасына дейін созылған, ұзындығы 170 шақырымды құрайтын тасжолдың 3 шақырымға жуық бөлігі 2012 жылы жөндеуден өткізілген екен. Ал қалған бөлігі биыл қалпына келтіріліпті.

Тасжолдың ашылуында сөз сөйлеген Алтай өлкесінің губернаторы 20 жылға жуық уақыт бойы аталмыш бағыттағы жолдың, әсіресе, Қазақстанмен шекараға жақын он шақты шақырымы ешқандай сын көтермейтін жағдайда болғанын тілге тиек етті.

– Біз жылдар бойы қараусыз қалып келген осынау жол учаскесінің халі екі ел арасындағы ынтымақтастық байланыстардың жоғары деңгейіне еш сай келмейтінін түсініп, тасжолды жеделдетіп қалпына келтіруге тырыстық. Нәтиже жаман болған жоқ деп ойлаймын. Бір мысал келтірейін, жөндеу жұмыстарын, әсіресе, көп қажет еткен 9 шақырымдық бөлігін қалпына келтіруге ғана Алтай өлкесінің бюджетінен 238,5 миллион рубль жұмсалған. Бүгін міне, көршілес жатқан екі аймақтың тұрғындары көптен күткен жөндеу жұмыстары аяқталып, жол салтанатты түрде пайдалануға беріліп отыр. Бұл – Алтай өлкесінің, жалпы Ресей Федерациясының оңтүстіктегі қақпасы. Сондықтан бұл жолдың екі ел арасындағы байланысты дамытудағы маңызы өте зор, – деді Александр КАРЛИН.

Ол сонымен қатар, Поспелиха – Курья – Третьяково – Қазақстан Республикасының шекарасы бағытындағы тасжолдың «Алтайдың үлкен алтын сақинасы» туристік маршрутына енгізілгенін де айтты.

Расымен де, қазіргі таңда Қазақстан мен Ресей Федерациясы, оның ішінде Шығыс Қазақстан облысы мен Алтай өлкесі арасындағы әріптестік байланыс өте жоғары деңгейде екені мәлім. Елбасы Нұрсұлтан НАЗАРБАЕВ та өз сөздерінде біздің ең басты стратегиялық әріптесіміз Ресей екенін жиі айтып келеді.

Мұны салтанатты шарада облыс Әкімі Бердібек САПАРБАЕВ ерекше атап өтті.

– Жол дегеніміз – тіршіліктің күре тамыры. Ал шекаралас жатқан аймақтар үшін жолдың орны тіптен бөлек. Қазақстаннан Ресейге және кері бағытта жүретін тұрғындарымыз үшін осынау тақтайдай тұзу жол үлкен сый болары анық. Енді Шығыс Қазақстанның көрікті жерлерін көріп қайтуға келетін ресейлік туристер легі де көбейеді деп үміттенеміз. Ең бастысы, бұл автомагистраль екі ел, екі аймақ арасындағы әріптестіктің нығаяуына жол ашып, экономикалық байланыстарымызды жаңа деңгейге көтереді деп сенемін. Қос тарап осындай тасжолдың болуынан тек қана игілік көреді, – деген облыс Әкімі Бердібек САПАРБАЕВ ресейлік әріптесі Александр КАРЛИНГЕ осындай маңызды шараға шақырғаны және шығысқазақстандық делегацияны ерекше қонақжайлылықпен қарсы алғаны үшін зор алғысын білдірді.

Расымен де, облысымыздың атынан келген ресми делегацияны алтайлықтар нан-тұзбен және әнмен қарсы алып, қуанып тастады. Сонымен қатар, шығысқазақстандықтардың назарына жергілікті шығармашылық ұжымдардың мазмұнды концерттік бағдарламасы ұсынылды.

Тасжолдың ашылуынан кейін облысымызға жол тартқан Алтай өлкесінің делегациясын шекараның бергі бетінде Шемонайха қаласындағы өнер мектебінің қазақ ұлт-аспаптар оркестрі әуезді әнмен, күмбірлеген күймен қарсы алды. Сонымен қатар, ресейлік меймандарға арналып киіз үй тігіліп, шашу шашылды.

Роботтандырылған сүт фермасының жұмысымен танысты

Ресейдің Алтай өлкесінің губернаторы Александр КАРЛИН бұл күні облыс Әкімі Бердібек САПАРБАЕВпен бірге Глубокое ауданының Бобровка ауылындағы «Бобровка+» ЖШС-не қарасты роботтандырылған сүт фермасының жұмысымен танысты.

Технологияның қарыштап дамуы бүгінгі күні адам еңбегін айтарлықтай жеңілдетіп отыр. Оның айқын дәлелі - ашылғанына әлі бір жыл да бола қоймаған осынау сүт фермасы. Мұнда бәрі де роботтандырылған. Сауыншының міндетін де робот атқарады.

«Бобровка+» ЖШС-нің директоры Талғат Қырықбаевтың айтуынша, қазіргі күні бұл сүт фермасында жүзге таяу симменталь сиыры бар. Мұндағы жануарлардың бәрі де Чехиядан әкелінген асыл тұқымды сиырлар. Таяуда бұл сиырлардың қатарын жергілікті қырық сиыр толықтырмақ. Фермада 6 «сауыншы-робот» бар. Бір робот күніне 60-70 сиырға дейін сауады. Жалпы, шведиялық «Delaval VMS» компаниясының «сауыншы-роботтары» мұндағы жұмысты айтарлықтай жеңілдеткен көрінеді. Барлығы төрт-ақ адам, оператор мен бақташы, мал дәрігері мен механизатор осынау қорадағы малға ие болады. Қазіргі күні сүт фермасы тәулігіне 1 тонна 200 литр сүт өндіріп отыр. Орташа есеппен бір сиыр 13 литр сүт беруде. Сүт фермасы басшылығы алдағы уақытта бұл межені 18 литрге көтеруді жоспарлауда.

Сүт фермасының қазіргі жай-күйін облыс Әкімі Бердібек САПАРБАЕВ пен Алтай өлкесінің губернаторы Александр КАРЛИНГЕ «Восток-молоко» ЖШС-нің бас директоры Сейілжан Сайлаубаев баяндап берді. Ол өңірдегі, тіпті, еліміздегі ірі жобаны «Бизнестің жол картасы» және «Жаңа бизнес бастамаларын қолдау» мемлекеттік бағдарламаларының аясында жүзеге асыру мүмкін болғанын да тілге тиек етті.

Мұндағы әр сиырдың мойын жібіндегі чипте барлық мәлімет сақталған. Осы чиптің көмегімен оператор сиырдың жағдайын, қайда жүргенін, тіпті, соңғы рет қай кезде сауылғанын да бақылап отырады. Бұл чипті сиырдың төлқұжаты десе де болады. Қонақтар компьютер арқылы сиырларды бақылап отырған оператор қыз Гүлмирамен де тілдесті. Мысалы, 72-нөмірлі сиыр күніне 14 литр сүт береді екен. Сондай-ақ, Алтай өлкесінің губернаторын сиырлардың маститпен қаншалықты жиі ауыратыны да қызықтырды. Гүлмираның сөзіне сенсек, бұл сүт фермасында санитарлық-тазалық қатаң сақталынады екен. Сөз арасында Алтай өлкесінің губернаторы Гүлмирадан қанша жалақысы алатынын да сұрады. Гүлмираның жалақысы - 60 000 теңге. Күніне небәрі 12 сағат қана жұмыс істейді.

Жалпы, «Delaval VMS» компаниясының «сауыншы-роботтары» әлем елдерінде 1998 жылдан бастап қолданыла бастапты. Ал Ресей фермерлері мұндай «сауыншы-роботтарға» 2007 жылдан көше бастаған. Ал Қазақстанда ашылған тұңғыш роботтандырылған бұл сүт фермасының қуатын әлі де арттыру көзделіп отыр.

Мұнан кейін облыс Әкімі Бердібек САПАРБАЕВ пен Алтай өлкесінің губернаторы Александр КАРЛИН Бобровка ауылындағы орта мектепке ат басын бұрды. Мектеп ұжымы қонақтарды өзгеше бір жылы шыраймен, шашу шашып қарсы алды. 2011 жылы пайдалануға берілген бұл мектепте бүгінгі таңда 299 бала қазақ және орыс тілдерінде білім алып жатқан көрінеді. Мектеп директоры Сандуғаш Нұралина қонақтарды ең алдымен мини-орталыққа бастап апарды. Мемлекеттік «Балапан» бағдарламасы аясында ашылған бұл орталықта 40 бала тәрбиеленіп жатыр. Мектепте оқушылардың білім алуына барлық жағдай жасалған. Еңбек сабақтарын өткізуге арналған шеберханалардың өзі де жұтынып тұр. Бір атап айтарлығы, бұл мектеп 2012-2013 оқу жылынан бастап «Мың бала» жобасын іске асыруда. Осы жобаға сәйкес шахматқа қызығушылығы зор балалар шахмат бұрышына келіп, «мидың гимнастикасымен» айналысса, тілге қызығушылық танытқандар үш тұғырлы тіл бұрышына барады. Сонымен қатар, бұл мектепте оқушыларға ара шаруашылығының да қыр-сырын үйрететін үйірме бар.

Мектеп фойесінде орналасқан мониторлар арқылы облыстық білім басқармасының басшысы Асқар Нұрғазиев Алтай өлкесінің губернаторына өңірдегі білім саласындағы хал-ахуалды баяндап берді.

Сондай-ақ, Алтай өлкесінің губернаторы өңірде жүзеге асырылып жатқан «Туған ел - алтын бесігім», «Мейірім» секілді туған ел мен жерге берері көп ізгі акциялар туралы да мәлімет алып, хабардар болды.

Мұндай этноауыл ТМД елдерінде жоқ

Өскеменге ат басын тіреген алтайлық делегаттарға облыс Әкімі Бердібек САПАРБАЕВ «Айтас-МП» ЖШС-нің құс етін тереңдетіп өңдейтін жаңа кәсіпорынын аралатып көрсетті. Биыл ғана іске қосылған бұл зауыт өңірдің Индустрияландыру картасына енгізілген. Мұнда мәртебелі меймандарды немістің озық технологиясымен өндірілетін шұжықтар мен деликатестер, жартылай фабрикаттар түрлерінің (150-ге тарта) көптігі және олардың сапалы болуы ерекше қызықтырды. Өндіріске қажетті шикізаттың алыстан арбаламай, іргедегі «Өскемен құс фабрикасынан» жеткізілуі де тиімді болып тұр. Жобалық қуаттылығы жылына 12 мың тонна өнім шығаруға әлеуетті кәсіпорынның құрылысына шамамен 2 млрд теңгеге жуық инвестиция құйылған, оның 1170,2 млн теңгесі екінші деңгейлі банктер арқылы несиелендірілген.

Бүгінгі күні бұл жерде екі жүздей адам еңбек етіп жүр. Келешекте жұмыс қуаттылығының артуына байланысты олардың санын екі есеге дейін көбейту жоспарда бар.

Заманауи үлгідегі зауыттың жұмысымен толық танысып шыққан Алтай өлкесінің губернаторы Александр Карлин жобаны қаржыландыру, жаңа технологияларды игеру, кадрлар дайындау сияқты мәселелерді сұрап, білді. Өз кезегінде мұндай жоғары технологияға негізделген өндіріс орындарының халықаралық талаптарға сай келетін өнімдері қазақстандық нарықта ғана емес, сонымен қатар шетелдерде де сұранысқа ие болатынын тілге тиек етті.

Рас, бүгінгі күні отандық нарықта саудаланып жатқан шұжықтардың біраз бөлігі сырттан тасымалдануда. Ал аталған зауыт осы олқылықтың орынын толтырып қана қоймай, экспорттың үлесін арттыруға зор мүмкіндік туғызады дейді мамандар. «Қазақстанда жасалған» деген маркамен сауда орындарына жол тартатын өскемендік шұжықтар республиканың барлық аймақтарына шығарылады және кәсіпорын толық қуатына көшкенде көршілес мемлекеттерге, оның ішінде Ресейдің Алтай өлкесіне де жөнелтілмек.

Бұдан кейін делегация өкілдері біздің облыстың тағы бір мақтанышы – ауыл шаруашылық өнімдерін делдалсыз саудалайтын «Fresh Market» сауда орынымен танысты. Елімізде баламасы жоқ гастрonom израильдік инвестордың қаржыландыруының арқасында бой көтерген. Оның негізгі қызметі – жергілікті фермерлерге өз өнімдерін делдалсыз сатуға жол ашу. Іші кең, әрі барлық талаптарға сай жабдықталған ғимаратты аралаған қонақтар сатушылармен тілдесіп, сатылымға қойылған тауарлар бағасының қарапайым халық үшін қолжетімді болуына көңіл аударды. Барнаулдағы бағасымен салыстырғанда біздің Шығыста өзімізде өндірілетін өнімдердің құны әлдеқайда төмен көрінеді.

Аймақ басшысы Бердібек САПАРБАЕВ мұндай нысанды іске қосудағы басты мақсат – тұрғындарға сапалы азық-түлік түрлерін арзандатылған бағамен ұсыну болса, кәсіпкерлер үшін өз өнімдерін ешқандай алыпсатардың қызметіне жүгінбей-ақ тікелей саудалауға жағдай жасау. Айталық, фермерлік дүкендегі бағаның қала базарларынан 15 пайызға төмен болуын облыс әкімдігі қатаң бақылауға алған. Сол сияқты, шаруа қожалықтарының сауда орыны үшін жалға төлейтін ақысы да жоғары емес. Ғимаратта азық-түлікті сатуға, сақтауға, тасымалдауға қолайлы жағдайлар жасалған, тіпті ветеринарлық зертханасы, тоңазытқыш пен мұздатқыш камералармен жабдықталған қоймасы да бар. Келешекте гастрonom аумағында нан пісіретін наубайхана мен сыра дайындайтын цех қатарға қосылмақ.

Қысқасы, азық-түлік өнімінің қауіпсіздігі мемлекеттік бағдарламасы аясында өндіріске енгізілген «Fresh Market» сауда орыны барлық стандарттық талаптарға жауап беретін, еуропалық үлгіде салынған нысан екендігіне Алтай өлкесінен келген әріптестеріміздің көздері анық жетті.

Өскеменнің көркіне өзгеше сипат қосатын нысандардың тағы бірі ЖМК ықшам ауданында құрылысы жүріп жатқан жекпе-жек сарайы мен жеңіл атлетика манежі. Делегаттар аталған қос нысанға тізгін тартып, құрылысы әлі аяқталмаса да ғимараттың ішін көріп шықты. Лондон олимпиадасының чемпионы, жерлесіміз Ольга Рыпакованың есімі берілетін манеж барлық халықаралық талаптарға сәйкес салынууда. Қолданысқа берілген соң мұнда Азия мен Еуропа біріншіліктерін, тіпті керек десеңіз Әлем чемпионатын өткізуге әбден болады. Өңір басшысы дәл осындай жеңіл атлетика манежі әзірге елімізде жоқ екенін еске салды. Жобаның жүзеге асырылуын «Қазатомөндіріс» ұлттық компаниясы қолдау білдіруде.

Сол сияқты жекпе-жек сарайы да қаладағы сәулетті ғимараттардың біріне айналмақ. Бизнестің әлеуметтік жауапкершілігі аясында бой көтеріп келе жатқан нысанның жобасын Шығыстағы іргелі кәсіпорындардың қатарынан саналатын «Қазцинк» ЖШС өз қаржысына жүргізуде.

Бұл қос ғимарат қолданысқа берілсе, аймақтағы жастардың басым бөлігі спортпен шұғылданып, болашақ олимпиада чемпиондары шығатынына сенім мол.

Көршілеріміздің көз жауын алып, таңдайын қақтырған көрікті жерлердің бірі – Өскеменнің бетбейнесіне айналған этносаябақ болды. Аумағы атшаптырым, шамамен 117 гектар болатын сәулет-этнографиялық және тарихи-ландшафтық мұражай қорықты делегаттар адамдар отыратын тіркемесі бар шағын мәшинеге мініп аралады. Өйтпегенде ше, күн сайын көркейіп, жер көлемі кеңейіп, жаңа нысандармен толығып отыратын кешенді жаяу аралау мүмкін емес. Сондықтан келушілерге арнап адамдар тасымалдайтын тіркемелері бар шағын көліктер қызмет көрсетеді. Бұрындары арам шөп басып, бұта-қарағаннан аяқ алып жүре алмайтын алқапты өз қолымен «жұмаққа» айналдырған Николай Зайцевтің еңбегін облыс Әкімі делегаттардың алдында жоғары бағалады. Мұражай-қорықта алтайлық бауырластар назарына қолөнер шеберлері мен суретшілердің, мүсіншілердің жасаған татуындылары, сондай-ақ жақында тұсауы кесілген «Ұлы жібек жолы» кешені көрсетілді. Этноауылдағы Ұлы жібек жолының бойында қазақтың хан сарайы, қытай императорының, үндінің және Орталық Азиядағы әміршілерінің сарайлары орналасқан. Ежелгі «Каравелла» кемесінің бортына шығып, айналаға көз жүгіртіп тамашалаған құрметті меймандар этноауылдың ғажайып кешен екенін баса айтты.

– Этноауылдан алған әсерімді сөзбен айтып жеткізе алмаймын. Мұндай керемет кешен мен білсем ТМД елдерінде жоқ, сіздердің өңірде ғана бар. Тағы бір байқағаным, сіздердің облыста тың идеялары көп және оны іске асыруға құлшыныстары ерекше азаматтар жетерлік екен. Ең бастысы сол идеялардың орындалуын барынша қолдайтын, қаржылай және моральдік тұрғыдан көмек көрсететін шығармашыл басшыларыңыз бар. Екінші жағынан алғанда, сіздер осы жұмыстарға бағытталған қаржының көзін мақсатты пайдаланудың арқасында ең өтімді, ең көрнекі деген жобаларды жүзеге асырып отырсыздар, - деді Алтай өлкесінің губернаторы Александр КАРЛИН.

Келісім құжаттары келелі істердің бастауы болмақ

Алтай өлкесінің Шығыс Қазақстандағы күндері аясындағы ең маңызды шара осы күні түстен кейін Өскемендегі «Алтай» технопаркінде өтті. Облыс Әкімі Бердібек САПАРБАЕВ пен Алтай өлкесінің губернаторы Александр КАРЛИН бастаған екі өңірдің кәсіпкерлері мен атқарушы билік өкілдері дөңгелек үстел басында отырып ынтымақтастық мәселелерін қозғады, бұған дейін бірлесіп атқарған іс-шараларды саралап, алдағы мақсат-міндеттерді айқындады. Ынтымақтастық байланысты одан ары нығайта түсетін келісім құжаттарға қол қойды.

– Кейінгі он жылда көршілес жатқан екі өңірдің арасында әртүрлі салаларда 29 келісім жасалып, бүгінгі күні олар өзінің жемісін беруде. Әсіресе, өнеркәсіп, құрылыс, ауыл шаруашылығы, білім мен

денсаулық салаларында бірлесіп атқарған шаруалар көп. Бірлескен кәсіпорындардың жұмысы да жаман емес. Ағымдағы жеті айда біздің облыстың Ресей Федерациясымен сауда айналымы көлемі шамамен 1 млрд долларға жетті. Бұл қос елдің экономикасы үшін үлкен қолдау, - деп атап көрсеткен аймақ басшысы Бердібек САПАРБАЕВ өңірдің әлеуметтік-экономикалық дамуы тұрақты екенін, ең бастысы әлеуметтік мәселелердің барлығы шешімін тауып жатқанын айта келе сөзінің соңында Шығыс топырағына келіп, осылай ынтымақтастыққа ыңғай танытып жатқандары үшін құрметті қонақтарға ризашылығын білдірді.

Аймақ басшысының айтуынша, татулығы жарасқан бауырлас өңірдердің байланысы ары қарай да өзінің заңды жалғасын тауып, осы кездесуден кейін де бірлескен жобалар көптеп қолға алынатын болады. Сонымен қатар осыған дейін жолға қойылған сауда-экономикалық, ғылыми-техникалық, гуманитарлық салалардағы байланыстар ары қарай тереңдетіліп, көкжиегі кеңі түспек. Ол үшін барлық мүмкіндік бар. Екі елдің арасындағы шекараның айқара ашылуы, Кедендік одақтың құрылуы осының бәріне оң ықпалын тигізетіні даусыз.

Бүгінгі келісім құжат осыдан үш жыл бұрын қол қойылған құжаттың жалғасы және оларды іске асырудың инструменті болып табылады. Бірлескен жобалардан мысал келтірсек, күрделі жөндеуден өткізіліп, Алтай өлкесінің Шығыстағы күндері аясында кеше ғана ашылған автокөлік жолының құрылысын айтқан орынды. Одан басқа жасалған келісімдердің арқасында біздің өңірден отыз дәрігер Алтай өлкесіне барып, біліктілікті арттыру курсына оқып келсе, бірнеше адам ем-дом қабылдау үшін көршілеріміздің көмегіне жүгінген.

– Алтай өлкесі биыл Ресейдің инновациялық өңірлері қауымдастығына кіріп отыр. Бұған біз өлкемізде жаңа технологияларды өндіріске көптеп енгізудің арқасында қол жеткіздік. Осы жетістіктерді сіздермен бөлісуге әрқашан дайынбыз. Айта кету керек, көршілес аймақтар арасында жасалған бұл құжаттар тек тарих үшін немесе мұрағатта сақталатын қағаздар емес, бүгінгі таңда нақты іске асырылып жатқан бірлескен жұмыстардың жемісі, - деп сөйлеген Алтай өлкесінің губернаторы Александр Карлин шекаралық аймақтардың ынтымақтастығы екі елдің экономикалық дамуына өзіндік үлесін қосатынын тілге тиек етті.

Сонымен қатар аталмыш жиында біздің облыстан «Шығысagroхолдинг» ЖШС-нің директоры Ержан Нұрбаев пен қонақтар жағынан Алтай сауда-өнеркәсіп палатасының президенті Борис Чесноков сөз сөйледі.

– Кедендік одақ біз сияқты кәсіпкерлерге өз өнімдерін одаққа мүше мемлекеттердің нарығына емін-еркін шығаруға мүмкіндік туғызды. Мәселен, біз Ресейдің Алтай өлкесінен жұмыртқа тасымалдасақ, ол жаққа көкөністер мен ұн жеткіземіз. Бұл экономикалық, сауда-саттық байланыстар осындай дөңгелек үстел басында ұйымдастырылған отырыстар мен қол қойылған келісім құжаттардың арқасында іске асырылады, - дейді серіктестік басшысы Ержан Нұрбаев.

Сонымен қатар отырыс барысында екі тараптың өкілдері Курчатовта Бийскі қаласындағы сияқты ғылыми қалашық құру, туризм саласында бірлескен жобалар жасау, жастар ұйымдарының тәжірибе алмасуы мәселелері әңгіме арқауына айналды.

Жиын соңында Шығыс Қазақстан облысы әкімдігі мен Алтай өлкесінің әкімшілігі арасында ынтымақтастық туралы келісімді жүзеге асыру бойынша аталған екі өңірдің басшылары 2014-2015 жылдарға арналған іс-шаралар жоспарына қол қойды. Сонымен қатар біздің облыстың экономика

жылдарға арналған іс-шаралар жоспарына қол қойды. Сонымен қатар біздің облыстың экономика және бюджетті жоспарлау басқармасы мен Алтай өлкесінің экономика және инвестиция басқармасы арасында меморандумға қол қойылды. Бұл құжаттар қойы қоралас, ауылы аралас жатқан көрші өңірлердің бұрыннан келе жатқан ынтымақтастығын одан ары бекіте түсіп, алдағы уақытта бірлескен үлкен істері қолға алуға негіз болмақ.

Нұржан Кенжеұлы, Мейрамтай Иманғали, Серік Өбілхан